

يَقُولُوا عَلَيْنَا حَمَار

الطبعة

2



أَشْعَارُ بِالْعَامِيَةِ الْمَصْرِيَّةِ

د. نهاد إبراهيم



دار العلوم للنشر والتوزيع

شعر عامية

يقولوا عليّا حمار...؟؟!!

الطبعة الثانية

د. نهاد إبراهيم

٢٠١٨

دار
المنشور
للنشر والتوزيع

يقولوا عليًا حمار...!!!

المؤلف : د. نهاد إبراهيم

الطبعة الثانية : يناير ٢٠١٨

التنسيق الداخلي : رفعت حسن سيد

دار العلوم للنشر والتوزيع

ص. ب : ٢٠٢ محمد فريد ١١٥١٨

هاتف : ٠١١٤٤٧٦٤٠٠٠

الموقع الإلكتروني : www.dareloloom.com

البريد الإلكتروني : daralaloom@hotmail.com

[Facebook.com/dareloloom](https://www.facebook.com/dareloloom)

Twiter : @dareloloom

جميع الحقوق محفوظة

رقم الإيداع : ٢٠١٧/٢٨٧٤٠

الترقيم الدولي : ٩٧٨-٩٧٧-٣٨٠-٥٤١-٩

دار
العلوم
للنشر والتوزيع

إن الآراء الواردة في هذا الكتاب لا تعبر بالضرورة عن رأي دار العلوم للنشر والتوزيع .

يمنع نسخ أو استعمال أي جزء من هذا الكتاب بأية وسيلة تصويرية أو إلكترونية أو ميكانيكية بما فيه التسجيل الفوتوغرافي والتسجيل على أشرطة أو أقراص مقروءة أو بأية وسيلة نشر أخرى بما فيها حفظ المعلومات، واسترجاعها من دون إذن خطي من الناشر

إلى
محبى الفن الراقى.


مقدمة

أعترف أنني كائن كسول جدا بشكل وحش ..

لكننى صديقة وفية لأصدقائى الأوفياء ولكلمات شعري الطيبة، وهى التى تلح علىّ فى الخروج إلى الحياة منذ سنوات طويلة.. تقترب من نصف عمرى الطويل القصير.

لم تيأس أشعارى من طرق الباب داخلى بعنف بكافة الوسائل المهذبة وغير الـ..، حتى أوشكت فى النهاية أن تهدم المعبد بأبوابه الأمامية والخلفية بتوحش مخيف فوق رأسى المسالم. وبعد تهديد سافر وأخير بالانفجار والقيام بعملية انتحارية تلوح بالفراق الأبدى، نجحت مساعيها وحررت نفسها بنفسها من وراء أسوار سطور أوراقى المتراسة بهدوء وتكاسل بالعدوى فى منزلى وحيدة لا يعرفها أحد إلا قلة قليلة للغاية، بما فيهم مؤلفة هذه الأشعار نفسها.

يوما ما سألتنى أصدقائى.. إلى متى هذا السكون الطويل ولماذا؟!.. خذلتنى كلماتى فى الإجابة.. لحظتها أدركت أن تهديدات قصائدى فى هجرى إلى الأبد جادة بالفعل، فأطلقت سراحها من أجلها وكنوع من الشكر لأصدقائى الحقيقين الذين تحمّلوا كسلى الإبداعى القاتل بصبر أيوب الجميل، ولهم الجنة ألف مرّة وإيهم القطرة السادسة للمرة الثانية.....



بيقولوا عليّا حمار..
مش ناصح!
مش مكار!!
مع إني حمول.. صبور
صبور جدّا.. حمول
أستحمل اعيش فى الجنة
أستحمل اعيش فى النار
عقلى على قدى لكن
عاجبنى ومريحنى
أظن انا حر ف رأيى
ومفيش حد شريكى
طلعت ولاّ نزلت
أنا راضى بحالى يا سيدى
وعذرى جوا إسمى
هعيش واموت حمار..

أنا دلوقتى ف مشوار
طويل جدّا عليّا
بدأته من ساعتين
ولسة معايا يومين
عقلى قاللى يا حمار..

سَلِّى نَفْسَكَ شَوِيَّة
وما دام صاحبك مش سامعك
نايم على نفسه وبايعك
فضفض معايا شوية
مين يعرف إيه مصيرنا
فى الأيام اللى جاية..؟!!

عقلى سألنى بصراحة
وصراحته دايماً راحة
إيه رأيك يا حيوان..
هعمل عنك إعلان
إنت تقول البيانات
وإنا البس المانيكان
يا تجيلك بيعة عظيمة
وتبقى كسبت نفسك
وتلاقى اللى يستاهلك
يا إما كلامنا ياخدنا
ونشوف سبب يشغلنا
بدال ما تنام كالعادة
وتخبط أى حاجة
بعدين تعور نفسك
يا عشت عيشة حلوة

مع حد يرضى بشكلك..
يا تموت من الكلام
وتخلصنى من أهلك!!

بداية الكلام..
وعنوان الإعلان..
يا حضرات الأفاضل
قدامكو حمار إنسان
قدامكو حمار زعلان
وأحيانًا مقموص
زهقان من البشر
اللى شبه التيوس
البهوات الأندال
بيمضغوا سيرتى لبانة
ع الفاضية والمليانة
عمّال على بطل
وكان ما بينا تار..

واحد يضحك اخوه
يقوللّهُ إنت حمار!
واحد يستغفل جاره

طمعان فى عياله وداره
ياخد على قد ما ياخد
بعديها يبرأ نفسه
ويعمل روحه عبيط
برىء ولا الحمار..
يخلف ما مد إيده
لأنه وحياة مامى
أخلاقه عاليه جدًا
متربى كما الحمار!

الحيوانات زمايلى
عايشة تالت ومتلت..
الناس مدلعاهم
دلّع سخيّف بزيادة
عايشين آخر موضة
لابسين كاروهات وسادة
وانا علشان حمار
ياخدوا راحتهم فى إهانتى
وبأكبر أكبر فاس
بيجوا ع الغلابة
يفشفشوا راس كرامتى
مع إنى حمار من عيلة

مش ابن البطة السوداء
ولا شبعان م السعادة!

يا مرارى من البشر..
رفعولى نبضى وضغطى
فقعولى كل مرارتى
سحبوا السكر من جسمى
وسابولى جبال أملاح!
يا خرابى ع البشر..
بينقوا الكلب نقاوة
إشى وولف..
واشى آرمنت..
مع إن سنانهم تقرف
ولا سنان التمساح..
أما القطه يا حلاوة
بيسقوها الشقاوة
عارفينها إنها خاينة
لكن يينولها بيت
ويدولها المفتاح!
أما أنا يرمونى..
آه والله ييرمونى
فى زريبة ضنك حقيرة

لو عايش.. برضه بركة
لو مُت.. هيمسحوا إسمى
من دفتر العليق
كإنى كلب وراح..

وحياة ربنا قرفونى
اللى يعيدوه يزيده
حكاية كل يوم
مالهمش شغلانة غيرى
يقفشوا ودنى الطويلة
ويهرونى شعارات
إياك.. إياك يا حمار
إوعى تعيش مرتاح!
لازم اشتغل على طول
أصحى زى الفرقة
وانام زى المقتول
ودا مقرر يومى
ولا فسحة ولا أجازات
ممنوع عليا الدنيا
ممنوع عليا الراحة
ممنوع اشتكى بصراحة
قال إيه.. الحياة كفاح!!

دا انا مش لاحق أتكلم
واشرحلك مواصفاتي
فى بيانات الإعلان..
طب إمتى وانا فى الشغل
ماشى على طول مبلم
طهقان من عيشة تغيط
مش فاضى أجيب مراية
أظبط رموش عنيا
أعدل لبسى شوية
مع إنه يونيفورم واحد
هى البردعة اليتيمة
فيها كل البهاريز
وساعات والله من غير
وبمشى كدا فى الشارع
عامل عرض استریتيز!

أهز ديلى هزة
عشان اهش الدبان
إلهى ينقرص..
يفتكروا عندى هفة

رافع راية العصيان
رافع حاجبى وحرنان
وبديلى بعترض!
طيب أعترض ازاي؟!
والشكوى تفيد بآيه؟!
دا المسموحلى فى الدنيا
أصبر واتحمل قهراً..
وهو الاعتراض
بيجيب نتيجة أصلاً!!!!!!
دى كلمة لأ يا حضرة
محتاجة قوة مارد
وميت عفريت معاه
ينكشوا كل المكبوت
على دقة مليون زار
طيب أعترض ازاي؟!
والشكوى تفيد بآيه؟؟?
ولما غيرى احتج
شئ اتغير يا بيه؟؟
دا اللى مايفهمش الدرس
بصراحة بيقى حمار!

وانا فاضى حتى أهرش
ولّا أساوى فى خيشى
دا انا عايش كدا بالقُدرة
بسعى ورا أكل عيشى
فى رقبتى عدّاد مخفى
بيعد معايا جروحي
مع إنى حمار كبير
عجزت من كثير
ويادوبك كل طموحي
بُقين مية وشعير
وف حالة الرفاهية
لما اتبحج شوية
عودين فجل وبرسيم

باخذ حمامى بالجردل
وينشفّ تحت الشمس
ولا روب ولا بشكير
متواضع واقتصادى
قلبى من الحقد فاضى
بيدفينى من جوا
فى حر وزمهرير..
عمرى ما قلت يمّ

لسانى ما ينطق عيبة
جرايى مافيهوش سم
بيسمو طييتى خيبة
بركين فى أى حته
بركين فى كل حته
وانام برة البيوت
ويادوبك كل طموحى
كل منايا فى الدنيا
اليوم على خير يفوت..

موطى دماغى وراضى
للعايق والهللوت
مش عاوز أبنى عمارة
مش كييف بنكنوت
أنا جيت الدنيا ديا
علشان اعيش واموت..

صاحبى عندى بالدنيا
أخدمه برموش عنيا
بالليل وبالنهـار
فى الجنة أو فى النار
ذنـبى يا كل ذنـبى

إنى فى نظر الناس
صريح ومش خبيث
ماعرفش أمشّى حالى
مخى مليون ترابيس
مش ناصح..
مش مكار..
وبعد دا كله برضه
بيقولوا عليّا حمار؟!

أنا مش زعلان من إسمى
ولا عمرى اتبرّى منه
ما هو أصله مش شتيمه
ولا يعنى دقة قديمة
دا معناه فى القاموس
إنى بوش واحد
كلامى زى فعلى
ولا بلدغ زى النحلة
ولا بلسع كالناموس
يا سيدى هيحصل إيه؟
يا سيدى العمر واحد!
والدنيا مش فلوس

أنا آيوة حمار حساوى..
لكن مش بلطجى
سلاحى هو لسانى
عندى فى الدنيا رأى
مش عايش بصمجى
لكنى مش بقوله..
ماجتش فرصة اقوله..

أنا أصلى مش عنيف
يعنى حمار شريف
شريف ومش ضعيف..
أنهى أحسن بالذمة؟
أشيل سينج ومطاوى
واموت فى خناقة فطيس؟
ولّا أتلهى على عيني
واخلّى رأى لروحى
وادور ع الرغبة؟؟!!

أنا هقرف نفسى ليه؟!
هتمنظر ع الناس ليه؟!!
إذا كان ربك خالقنى
بسلامتى حمار حساوى

أخرس لكن مش أطرش
جدع فى زمن خسيس..

أنا مش خجلان من إسمى
ولا ممكن افلفص منه
ما هو مش حاجة مشينة
ولا معناه فى القانون
إنى عامل جريمة
كل الحكاية إنى
مبادئى لونها واحد
هادى ومرتاح بالى
نوايايا مش خبيثة
عمرى ما كنت جاحد
يا سيدى الرب واحد..
إسمى على قد جسمى
مظبوط عليّا ظبط
من غير زقة لبيسة

مين قال إن انا غضبان؟!
مين قال إن انا جريان؟؟!!
بالعكس تمامًا جدّا

لو يعرفوا بس قيمتى؟
ويقدرّوا أصل عيلتى؟؟
طول عمرى ماشى دوغرى
ولا لف ولا دوران
عصير الحب ف قلبى
يعبّى أزايد الدنيا
ويدلق منها كمان
بياض قلبى ربانى
أروّق من لون الفل
طايح كما الطوفان
كلاس من أصل راقى
واجبى أحترم الكل
واوطّى راسى كمان
لكن تقول لمين؟؟
يا خسارة البنى آدمين!
أنا حاسس من جوايا
إن الناس بيصولى
على إنى كائن واطى
مستغنى عن قفايا
مكسور نفسى وبطاطى
كل اللى يضرب يضرب
وانا بال صرمة قديمة

محشية مليون قَرْش
وفوق منها الصراماتى!

كل اللى يضرب يضرب..
ويا ويلى يا سواد ليلى
لو بس غلطت غلطة
يبقى حسابى عسير
ذنبى يا كل ذنبى
إنى وحيد فقير..
حمار من نسل حمير..
شهرتى فى الدنيا ساذج
بريالة خيرى لغيرى
إكمنى بوش واحد
أهبل وعندى ضمير
ودى لوحديها كارثة
وانا هعمل إيه فى نفسى؟؟
طلعت ولاّ نزلت
ماليش ضرر كبير..

ولو انى سمعت مرّة
إنى قريب الحصان
البُق هو البُق

والدليل هو الدليل
لكن قريبي يفرق
إنه ونيس الكبار
يزيد عنى بالحدوة
وأنا عندى ودان حمار..

طول عمرى حيلة مايلة
كلامى مش كتير
مش شایل كارت واسطة
يحمينى ويفلّينى
يحمينى م العيال
والسافل والعويل
ذنبى يا كل ذنبى
إنى اتعودت أفوت
إنى بسامح كتير!

مش عارف ليه الناس
دائماً تاخذ بالظاهر
فاكرينى موطّى كسوف
غرقان فى حوض الخوف
يكونش انا عامل عاملة؟؟

أصول عيلتى شمبانزى..
وسمّونى حمار مجاملة؟!
بالعكس تمامًا جدًّا..
أنا عارف من جوايا
إنى ياللى اسمى حمار
حيوان إعجاز حقيقى!
كائن سوبر جبار!!
أحسن من غيرى كتير
أرحم من غيرى كتير
أقله مابنفلقشى
أقله مابعترضشى
لو سخطونى طرطور
ولّا رقونى غفير..

كل الناس يركبونى
يطلعوا فوقى بالجامد
وانا اوطّى أرگب سیدی
مع إنك لو تعقلها
وتشوف بعين حمار
تلاقى الكل عبيدى..
هما اللى محتاجنى

هَمَّا اللّٰى مَجْنَنى
ماحدش منهم يجرؤ
أبدًا يستغنى عنى
غبرى بىتوه من غبرى
علشان انا وحدى بس
حافظ دهاليز السكة
كله بيخاف م الضلّمة
وانا بس شجيع الحِثّة!

تسألنى عن إسم عيلتى؟
هاقوللك ماعرفوش
تدور فى أصول نيتتى؟؟
نأبك يطلع فشوش
أنا إسمى الأولانى
هو إسمى الآخرانى
وايه يهمكوا من عيلتى؟!
إذا كنا طقم واحد
جدى نسخة من ستى
وحمايا توءم أختى
حياتنا ع المكشوف
مالناش كتاب حواديت

ولا خزنة للأسرار
هنخبى إيه يا حسرة؟؟!
عمر ما حد دلنا
باسم مستعار!

وانا واخذ إيه م الناس
إلا كلام الناس..
يطلع عليه نهار
يسيح كله فى الزبدة
مش عارف مين الصادق
ومين ابن الهرمة!!

وانا هقرف روحى ليه؟
وعلياً من دا بايه؟!!
دى مش آلاطة فارغة
دا يأس وخيبة كاملة..
من كتر شيل الهم
أنا عارف نفسى كويس
من جوايا متواضع
غصب عنى متواضع
عارف حدودى كويس
مذاكر عيشتى كويس

عمرى ما سمحت لحد
يقوللى قوم اتلم
ماهو أنا ملموم من نفسى
وكاتم صوتى خلقة
وبرضه مش عاجبهم
دا شىء يجيب العلة
بشر عديمة الدم!

الناس شايفانى أخرس
بمزاجى أو مكتوم
وكإنى ليهم خاضع
لكن ماحدش فاهم
إنى حقيقى متواضع
عايش اليوم باليوم
شهامتى ولعة نار
مش ممكن أكسيف حد
كإنى صاحب بيت
بكُرم ضيوفى بجد

طبعى فانتاستك تحفة
مزهره ع الفرازة
طالع م الفرن طازة..

ومع خجلى الجميل
كل ما بوصف فى محاسنى
بزداد فى الاحمرار
معجزة كاملة من كله
تدعو للافتخار
وفوق دا كله إبيبيه..
شايف شغلى تمام
بشقى زى الحمار!

العبقريّة عندى
مش معناها الكلام
العبقريّة عندى
موهبة الصمت التام
بسمع واتأمل ياما
واشوف على قد ما اشوف
من ورا شباك حديد
قاعد متريع صاحى
على شرط من بعيد..

ناس تركب فوقى سعيدة
وناس راكباها الندامة

عارفهم أنا وحافضهم
معلّمهم بعلامة
عمرى ما منعت حد
ماهو لو يابدى اختار
أعيش عيشة نضيفة
خفيف فوق سين الريشة
خالى مارگبش حد
وابرطع بقى يا حلاوة

وانا هفلق روحى ليه؟
وهحرق دى ليه؟!
اللى يركب يتفضل
واللى مايشتري يتفرج..

فيه صنف من الركاب
بعيد عنك حمار!
يمسك ديلى ويتشعبط
يسيب كل ضهرى
ويحصل إيه؟!!
ماعرفشى...
حاسب لحسن تتعور!
وهوب الاقى كله طار

رجله تجلّى من فوقى
بيقلقل وبيتمرجح
ثم يا عينى عليه
يندلق الناحية الثانية
واشوفه جنبى متكور
حمار ابن حمار!!
النوع دا يا ناس غلبان
مش شايف من قدامه
أبعد من صف سنانه
شقيان معدوم العافية
بيقلقل كالغوّار
فايح منه البخار
لولا الملامة لاقول
مهود زى الحمار!

الراجل الغلبان
يطلع فوقى..
سرحان!
يمشى ورايا..
سرحان!!
شكله شوال متكعب
ودقيقة تجر دقيقة

يميل كغصن البان
اللى نافر من بعضه
ويبدأ يزوم ويفقرّ
يزحلق سيّنة.. سيّنة
يحضن ودنى وينام
الفقر جايبله الكافية
خلاه زى العيال
ماحصلشى البغال!
لسعة السمسم تخضه
وقمر الليل يعضه
ياكل لقمة ويتصبرّ
النوم يحل عليه
يرخى صوابع رجليه
وف وسط الأكل يشخّر!

الصف دا منه كتير
بالبقجة والقناطير
وانا ماشى عادى جدّا
فى حالى طبيعى جدّا
اللى يركب يتفضل
أنا شخصيّا بكافح
وماشى مش متعطل..

ما عرفشى إسم حد
ما باشوفشى باسبور حد
الناس بتحس معايا
إنها فى سلام وأمان
عايشة تحلم على ضهرى
سارحة فى تبات ونبات
مطمنين ببعض
متونسين ببعض
وحقيقى متفاهمين
تمام زى الإخوات!

الصف دا منه كتير
من غير ما تسأل عنه
تلاقيه عابر سبيل
وشوشهم زى وشى
موضة قديمة كحيانة
تحت همومها غرقانة
واقعة من قعر الدنيا
حلمها يتسرب منها
وما حدش دارى بيها
وشوية شوية تنفث
زى خرم العوامة!

إيه يعنى ناس منسية
مرمية كعقب سيجارة
متربّطين بالجامد
فى رجل الخوف بدوارة؟
يركبوا على ضهرى وهاتك
يقفشوا زمامير رقبتى
يهرونى طبطبة
لما يجيبولى العصبى
والله ساعات بشك
لتكونشى بصبصة
واطلع حمار من جهلى!

يا ناس اعملوا معروف
خِفوا إيديكو شوية
إلهى قطر يدوسنا..
يقولولى يا سيدى استحمل
كفاية علينا الخوف
نازل لسوعة فى وشوشنا..

أبص بطرف عينى
وامثلّ إنى هغضب

زى الحصان الجامح
أو إنى هعمل غارة
واخلّى الدم سايح
تحوشنى عيون كئيبة
جواها ايام حزينه
زى الصندوق الأسود
اللى يلاقوا بقيته
مع أشلاء الطيارة

عيون بتزوّع منى
ما بتقدرشى تواجهنى
زى الصياد الخايب
اللى ضيّع حياته
فى حلم مستحيل
قال إيه عايز يسطاد
الحوت بالسنارة!
عيون مفتوحة غضبانه
مقتولة ف مليون غارة
سايحة مالهاش ملامح
واكلها الجوع والحزن
مهدودة ع المحارة!

أنا عارف كل حاجة..
أنا فاهم كل حاجة..
صاحى زى المنشار
لكن بنام بمزاجى
علشان أريح بالى
وعشان رزق عيالى
وادينى ماشى موطّى
وعامل نفسى حمار!

وكل دا كله ليه؟؟
علشان قال إيه مش ناصح
علشان قال إيه مش ناصح
يا خسارة.. مانيش مكار
لكن برضه فى الآخر
إسمى الرسمى حمار..
صحيح ودانى طويلة
إنما قلبى عمران
ولا قرية البضايع..
وانا هفلق روحى ليه؟
وهنبج جسّ ليه؟!
ذنّبى يا كل ذنبى

إنى مؤدب مش صايع!
أنا أصلى من زمان
قررت قرار متين
قررت إن انا ماسكتشى..
وبرضه ماتكلمشى..
ما هو أصلى فى الحالتين
حمار وحقى ضايع..

أحب أؤكد ليكو
يا حضرات الركاب
إن انا محسوبكم عيشرى
ولا عمرى كنت كيشرى
وعشان أكون أمين
يا أفاضل الركاب
أنا من جوايا عِنْدَى
بزنجر وساعات يَكْدَى
ألعن من ميت قبقاب!

وعموماً دا شىء نادر
لإن حقيقة طبعى
فُكْهَى ودمى خفيف

وأسطى فى المونولوج..
هقول إيه ولاّ إيه؟!
همدحك نفسى بإيه؟؟!!
من غير أوصاف زيادة
كل اللى فات عناوين
مجرد مسح زور
تلات كلمات يا دوب
تفتح نفس الزبون
واللى غاوى الإعلان
وعشان قيمة الوقت
كل التفاصيل تلاقوها
على صفحات الكتالوج

أعيش على قد ما اعيش
عمرى ما كنت ودنى
بالعكس جدّا خالص
أخوكم صاحى مدقدق
إتفرج بقى على ريحتى
بعد الحما والتشطيف
ماديش ودانى أبداً
لواحد مش نضيف..
على بعضى اتاكل أكل

ودا طبعًا تعبیر نظری
مش محتاج للتعریف!
أما من الناحية العملی
أنا طبعًا مش مسئول
لما غیرى یعبینی
جوا علب البولویف!!

وشى صحیح ملخبط
والخُلقة عکرة قِئمة
مافرقشى عن قرايى
کله محصل کله
قصدى على الحمير..
کلنا سلسال فى بعض
لکن ماحصلش أبدًا
إننا عضينا ف بعض

ورغم مواصفاتی
وأخلاقى الحميدة
ساعات نصیبى یحذف
فوق ضهرى رکوبة مصیبة
أقل ما یقال عنها
عالم تقرف وبيئة..

نصیبی اللہ یسامحہ
ساعات واللہ من نَفْسِه
من غیر ذنب یعاقبنی
باللی عاوز یرکبنی
ویکون مش طایق عیشتہ
من کُتر تخن کِرشہ!
دا صنف غیر التانی..
التانی مظلوم راضی
لکن أبو کِرش عریض
محطوط زی الآتایہ
فوق ضهری أنا الغلبان
ربنا یاخذک یا بعید!!

ومہما یکبر کِرشہ
یتمسح أوی فی الدنیا
بین الأشجار یتشقلب
زی سیرب الغربان
یکبش علی قد ما یکبش
وبرضہ ما بیقاش راضی!
واللہ ساعات بتلخبط
مین فینا اللی حیوان!!

أنا اشوفه من هنا..
وانهّق من هنا..
أبو كرش طويل عريض
يجرى ويحط فوقى
زى زكية البرقوق
ويوسوسله مزاجه
يرقعنى بالشلوت!
بيفش غله فيّا
وبكل تُقله عليّا
يناولنى بسينّ الخشبة
أو بالحلة والكبشة
كل اللى ف إيده حلو
أهم حاجة عنده
يكسرلى ألف ضلع
المؤذى ابن المؤذية
بالذمة دى مش حمورية؟!!

إكمنى ودانى طويلة؟
إيه يعنى.. مريحانى
تسمع دبيب النملة

وعاملالى شعبية
وقيمة ف وسط جيرانى

خلى اللى يركب يركب
مسيره ف يوم هينزل
أو ازقه من فوقيا
أنا كدا عايش متوازن
وف منتهى الشفافية
ساعات بضحك شوية
ساعات ببكى شوية
لكن الضحكة بتمرر
لما تقلب سخرية!

فيه منكم حد يقدر
يسمع نكت على شكله؟؟
مين فيكو جدع يتحمل
يتشوى تريقة على عقله؟؟؟
وبدال المرة مية

واحد يضحك اخوه
يقولله إنت حمار!
واحد يستكرد جاره
ويعمل نفسه حمار!

أسمع كل النكت
أضحك وأقول ظريفة
أمثل إنها حلوة
حتى لو مش لطيفة
أعطى عيني برجلي
قال يعنى نكتة قوية
مع إنى فى الحقيقة
بكركر من الألم
بكل روح رياضية

وانا ازعلّ نفسى ليه؟!
وانا هقرف روحى ليه?!
كبرّ كبرّ يا عم
أنا عايش فيها مسافر
خلّى اللى يقول يقول
ربنا يشفى العقول
والشاطر اللى يضحك
ويكركر بس الآخر..
مين فى الدنيا دى قدى
باربع رجلين وحوافر!

طول عمرى بشيل واودى
مخاليق أشكال والوان
شغلتنى فى الدنيا ديا
أدى دروس خصوصية
مجاناً للإنسان
أطلع راجل للآخر
واقدم أى خدمة
ضيفى مكروم للآخر
حتى لو كان جبان..
يضربنى واقول دى لعبة
ينغزنى ببوز ضوافره
ويموع نفسى بعرقه
وانا ساكت جداً خالص
ماهى دى أصول اللعبة..

أرجو يكون الإعلان
شافى وافى للشارى
لو جه حد وعبرنى..
يبقى حققت حلمى
ولبست حزام أمان
وان حد ماعبرنيش..
يبقى مصير إعلانى

رُفِرف مَرِیوط فِی دِیْلِی
أَهْش بیه الدبَان!

معلش ماتزعلوش
لو اتکلمت قلیل
معلش ماتتصدموش
لو اتکلمت کثیر
أنا أصلی وش کسوف
ماعرفش اقدم نفسی
ماقدرش أحلّی روحی
علشان أنا عقلی نمم
یا جماعة عقل حمیر..

یا حضرات الأفاضل
آهی دی نهاییه الإعلان
یعنی خلاصة الخلاصة
قدامکو حمار مفروس
من الدنيا الخبّاصة
أنا ریحتی مش ولا بد
مش طایق نفسی صراحة!!
مش شایف رجا لعیالنا!!!

لكن من كل بُد
كان لازم اسلّي روحى
يمكن يجد جديد
والحق بواقى زمانى
واعيش ايام مرتاحة
أصل المشوار طويل
والعمر بيجرى منا
يادى الواقعة ياربى
بردعتى وقعت منى
وفيه ضيوف جيانا..

وانا هفلق نفسى ليه؟؟
ويهرى ف روحى ليه؟؟?
سيبوها مش مهم..
اللى ما يشتري يتفرج..
بُصُوا مايهمكوش
دققوا ولاتنكسفوش
أنا مش عريان بلبوص
أنا لابس الحكمة هِدْمَة
جوايا فليسوف
حمار وفلفسوس
مافيهاش جنس حاجة!

طريقى كله مسالك
بمشى بين الحفر
واتجنب المهالك
حمار وفلسوس
من غير ما حد يسأل
أكبر دليل على ذلك
إنى ماعيش فلوس!

بسمع شتيمتى بودنى
واقول الله يسامحهم
ربنا يهدى النفوس
ربنا يشفى التيوس
كل دا علشان مش ناصح
علشان.. مانيش مكار
وبعد دا كله برضه
يقولوا عليّا حمار!!

حدّش قال يشترينى؟
حدّش نفسه يواسينى؟؟
باينى بكلم نفسى
ياما فى الحبس مظالم
ياما فى الدنيا حمير

وانا هعمل إيه فى نفسى؟؟
واقف على الحدود
لا انا طایل اعيش فى الجنة
ولا طایل اعيش فى النار
قولوا معايا يا جماعة..
أنا أهتف وانتو ورايا
فليسقط الاستعمار!
فليسقط الاستعمار!!

يا حضرات الأفاضل
آهى دى نهاية الإعلان
فى اليوم الأولانى
لو تفتكروا فى الأول
أنا قلتلكو م الأول
أنا ماشى رايح مشوار
بدأته من ساعتين
ولسه معايا يومين
دلوقتى ف تلك اللحظة
دلوقتى بتلك القفلة

خَلَّصْتَ الْيَوْمَ الْأَوَّلَ
أَوْ يَعْنِي بِمَعْنَى أَصَحَّ
الْيَوْمَ خَلَّصَ جَوَايَا
لَمَّا عَقَارَبَ السَّاعَةَ
أَخَذَتْ دِيلَهَا فِي سَنَانِهَا
وَجَرَّيْتُ جَرِي وَرَايَا
تَتَوَسَّلُ وَتَبُوسُ إِيْدِي
مَعْلَشَ نَفْسِهَا حَلْوَةً..
رَكَعَتْ عَلَى رُكْبَةٍ وَنَصَّ
تَسْتَحْلِفُنِي بَعِيَالِي
وَبِالرَّخِيصِ وَالْغَالِي
تَمْضِي مَعَايَا مَعَاهِدَةٍ
تَنَامُ وَلَوْ ثَوَانِي
نَفَسُهَا رَاحَ وَيَلْقُفُ
مَشَّ قَادِرَةٍ خَلَاصَ تَلَا حَقْنِي
أَمْلَهَا وَكُلَّ مَنَاهَا
تَغْفُلُ بَسْ ثَوَانِي
عَلِشَانِ مَعَ شَمْسِ بَكْرَةٍ
تَقْدَرُ تَفْتَحُ عَيْنَهَا
تَسْتَقْبِلُ يَوْمَهَا الثَّانِي
مَنْ غَيْرَ مَنِهَاتٍ
مَنْ غَيْرَ كَوْمِ الْإِهَانَاتِ

اللى بيصحى عليها
كل اخوانا الحمير
على وعد نكمل تانى
ونواصل بعد الفاصل
ربنا يحيينا جميعًا
قولوا قادر يا كريم
ولحين ما ييجى معادنا
أهديكم كل سلامى
وأشواقى وغرامى
يا رب أحلم بيكو
يارب تحلموا بيا
إلهى وانت جاهى
يرزقوا بالاستقرار
ولا تتشحطوا شحطتى
وتلفوا كل الدنيا
وتدوب كعوب رجلكم
وانتو عنيكو مغمية
ولا بقى حصلتوا تور
ولا بقى حصلتوا حمار
دى دعوة كلها خير
طالعة سخنة من قلبى
بتطقطق كالغشار

دى دعوة متشفية
خالصة العهد والنية
مضمونة مية المية
وكفاية إنها طالعة
دوغرى من قلب حمار..

يا صباح الخير يا سادة
يا صباح الورد البلدى
يا صباح العلف الأصلى
يا صباح كله حكايات
إمبارح كتر خيره
عدى وراح وفات
وفيه مثل بيقول
كل اللى فات مات

الأمثلة دى مقبولة
فى عالم البشر
مش عالم الحمير
عندنا إحنا ف كتبنا
الحدوة كبسولة
فيها كل العبر
وعلينا اننا نتعلم
منها علشان الجاى
لعل وعسى نتمدن
ونقلل الحمير..

لكن دا كله كلام
وبرضه مابيحوأشى
يعنى مابنتعلمشى
آهى أمثال والسلام
وعلينا نحترمها
حتى لو بالكلام

أهم حاجة عندى
إن النهاردة بتاعنا

أنا جيت ووعد الحر
دين فى رقبتة للكل
وزى ما اتفقنا
عُدنا لكم بعد الفاصل
نفتتح اليوم التانى
علشان اقدم ليكم
كواليس الفصل التانى
ونزىح كل الستارة
على طول ع الفصل التانى
من غير أى cut
وبعد الانتراكت
هحكي لكو حاجات من برة
وشوية من الكواليس
لكن مش كله كله
برضه نراعى أحياناً
سراديبي مشروخة جوايا
عايزة شوية تنكيس
خصوصاً لما تحوى
ذكريات ومواقف
معيشانى تعيس
لو هفتح باب سكتها
هتقلبلى المواجه

ولا هعرف انام ولا أصحى
من ترفيس الكوابيس!

نبدأ على طول يا جميل
أحداث الفصل الثانى
الثانى والأخير
إياكش حد يزعل
إياكش حد يقلق
ويفتكرنى بخيل
أنا فرد ف عيلة كبيرة
شجرتها حمير × حمير
لو حد غاوى يسمع
حواديت ماتنتهيش
خدوا عنوان الزريبة
هتلاقوا الخير وفير
على قد ما تقدر عبي
على قد ما تقدر شيل
كنوزنا هناك بالزوفة
ولا مغارة على بابا
تنفع حواديت زمان
تنفع لكل زمان

دا كلام له معنى يابا..
طبعا كلنا عارفين
قاسم مقبوض عليه
قاسم شقيق على بابا..
ماهو كان حرامى كبير
سرق حرامية غلابة!
يعنى لو حد راح
علشان يسمع حوادث
الأربعين حرامى
والأربعين حمار
مش ممكن خالص أبداً
ياخدوه هناك أسير
إطمنوا جداً خالص
ما أكثر الحمير..

طبعا مش محتاجين
تتأكدوا إنى صادق
ماهو انا لو كنت بكذب
ومعايا إثبات رسمى
إنى ناصح مكار
ماكانش حد يجرؤ
يقوللى إنت حمار!

حالا هبدأ أحكيلكو
كلام مايتنسيش
أنا أصلى حمار حقانى
مش كلب لولو كنيش
بتحمل مسئولية
كل كلامى لإخوانى
برانى أو جوانى
آهو كله كلام × كلام
أهم حاجة عندى
نبدأ فى الفصل التانى..
إياك حد يتصور
إنى خايف من حاجة
وبتوه فى الكلام!
لا أبداً وحياة عيلتى
أنا مابخافشى من حد
أنا مابوطيش لحد
أنا بس خايف السمسم
تنقح فى نافوخى زيادة
واهلفط بالكلام
وانسى كل الهزار
واتكلم جد الجد..
يا خوفى لهيب السمسم

يلطّش راحة عقلى
والخبط فى الكلام
واطلع حمار بجدا!

علشان كدا باستأذنكو
يا ريت ماتأخذونيش
أنا مش هقدر أركز
إلا لما افطر واشبع
علشان اوزن كلامى
لتفلت كلمة ولاّ
أتهور وانسى ولاّ
إنى على طول يا حبيبي
جنب الحيطان بعيش

بمناسبة الفطار
واللى عايز الفطار
فيه شوال من تحت دقنى
متدلّ دل زى الحيل
مليان برسيم متوسّخ
مزروع حشرات بتهفّ هف
بديل ومن غير ديل
متعلّق فى لوح رقبتى

ومخلّى عيشتي ضلّمة
ألّعن من كُحلّ الليل
على بال ما برفعه عندي
وأفضل إحايّله بالذوق
رأسًا من تحت لفوق
يمكن يحن الأكل
بكل محتوياته
ويدخل جوا بُقى..
على بال دا كله ما يحصل
بكون شربت الويل
طفح معايا الكيل
عذاب أزلّى من يومى
واللى ما يفهمش يقولك
حمار مبسوط بيهجّص
بياكل ويبترقص
واقف على مشط رجله
وساعات بيدق الكعب
وكإنى بدوس همومى..
ما حدش فاهم إنى
واقف بفرك فى روحى
ألّعن من صف شعب
مزنوق واقف مترصص
فى طابور مرحاض عمومى!

عذاب أزلّى من يومى
خصوصاً لو عرفتوا
إن حبال الشوال
دايبة زى الرمال
مصنوعة من الهوا
سراب آخر جمال
وعامل نفسه شوال..
كل ما اسايسه يزحلق
وينزل تحت كمان
وانا وراه بنهق
من كُفر الجوع بزقزق
وبصرُح كالعيال
كل ما احايله يزحلق
وكسرة نِفْسى تكبر
وسعر كرامتى يرخص
وانا بتشحتف وراه
عيشة ولا فى الخيال
لحد ما الاقى روحى
منفوخ وبنحنى
وببقى ولا أى فخر
بالظبط شبه الشوال..

آخر ما بزھق خالص
بنطُرہ على وشى نظره
وانا بدعى واقول يا رب
تنزل عليّ المطرة
بلُحَق على قد ما بلُحَق
والباقى نصيب الأرض
أبص عليه بحسرة
بعديها بخرس خالص
ومناخيري فى الأرض!
فيه حد يقول يا عالم
إنى اتبهدل يوماتى
واقضى عمري بشكى؟!
فيه حد يقول يا هووه
إنى اتعذب ليلاتى
وماليش أى شغلانة
إلا أغنى ظلموه!!!
والآخر يضربونى
ذنبي يا كل ذنبي
إنى بسأل سؤال
طب أكل بس ازاي!!
يتغاضوا من السؤال
يمسحوا بيّ بلاط

القرية والمدينة
علشان بوسّخ نفسى
وبعتر الشوال!!
دا ناقص يطلبوا منى
أكل زى البهوات
بالشوكة والسكينة
وتبقى سيرتى لبانة
ومضحكة للعيال!!!

كل دا عشان عايز افطر..
علشان حاجة من حقى..
والآخر إيه مصيرى؟
لما اجى أقول جعان؟؟؟
يتهمونى حرامى
عايز أكثر من حقى
وابقى لا حصّلت شريف
ولا حصّلت المحتال!!

بمناسبة الشوال
أنا بسمّيه شوال
من باب تعظيم لذاتى

بنفخ روحى بالونة
ترفعلى معنوياتى
لكن حقيقة الأمر
دا جراب وضع مفتل
لأ حتى مش جراب..
دا كيس قماش معفن
لأ حتى مش قماش..
دا شئى مبلول منتن
مالوش أصل وعنوان
لا يركب على إنسان
ولا يرضى بيه حيوان!

لا تعرف كان زمبيل
خدوه وقيفوه
علشان البسه على راسى؟
لا تعرف كان فستان
قصوه وضيقوه
عملوه ميني جيب مقاسى؟؟
شوال غريب عجيب
شئى فردانى فى الكون
والله ما يرضى حمار
يمسح بيه الكراسى..

لكن بما إني حمار
مسامح مش مكار
إديته إسم حركى
ويندهله منديل
ويا ريت ماحدث يسأل
عن موطن المنديل
لا عمره قد إيه..
ولا كات وظيفته إيه..
كفاية تعرفوا إني
خمنت بطول العشرة
إنه والله أعلم
كان دوره قبل سابق
كافولة اخونا الغيل!

مع ذلك ما علينا
دى كلها رفايع
بقى هى جت على دا؟!
دا فيه ألعن من دا..
ما انا قتللكو من الأول
أنا كائن حقى ضايع..

وعشان مابقاش ممل
أكثر ما انا ممل
مش معقولة أنا هاكل
باكل مطرح ماباكل
وانتو هتستنونى؟!
وحتى لو حكيت
والأكل مشلفط بقى
لا ممكن تفهمونى..
لهذا أنا قررت
أتلهى على عيني واكل
برسيم وخَص وتبن
خمس دقائق بس..
ثلاث دقائق بس..
وليكو عليّا تعيشوا
فى أوقات الفراغ
مع اخويا وتوئم روحى
مع حمارى الاستبن

أنا سجلتلكو بصوتى
مقدمة الديوان
بالذات أول سطرين

من ورقة الإعلان
والله بايئى بلخبط
والشمس ناقحة جامد
وهبيع فى الكلام..

هنقول تانى الإعلان
ونفكر باللى كان
ونسَمِّع اللى ماكانشى
وانا راخر لسه بكافح
باكل وانا برضه بمشى
أنا مش جايب من برة
ولا غاوى إبتكار
معروف فى وسط الخلق
إنى بحب اللت
إنى بموت فى العجن
ودا طبع أصيل أوريجينال
فى بامفليت الحمار!

نبدأ م الأول تانى
أحداث الفصل التانى
مع بعض الاختصارات

وقليل م الإفیهات
ومغیش مانع فی السکه
من بعض التغیرات
لزوم کسر الممل
وحلاوة التحیشات

یا حضرات الأفاضل
یا حضرات التجار
بتقول علیّ الناس
بیقولوا علیّ حمار..
مش ناصح!!
مش مکار!!!
مع إنی مش کسول
نشیط جدّاً.. صبور
أستحمل اعیش فی جهنم
أستحمل اعیش فی النار
أنا لسة ماشی ف حالی
وبکمل المشوار
نزلت ولاّ طلعت
شغلّتی فی الدنيا حمار

ولإني عندى فراغ
ويسيب عيلتى أيام
وبتوحشنى الكتاكيت
ساعات بضطر انتش
من برطمان السكر
يا دويك الفتافيت..
أنا خايف مرّة أموت
قبل ما اخلص حدوتة
واحدة من الحواديت!
ما انا كل ما اروح مشوار
بحط كل همى
فى الفصل الأولانى
وافضل اراجع واذاكر
وافضل اهاجم وادافع
واحكى يا دوب تناتيف
من لوحة الفصل الثانى
حكاياتى دايماً عايمة
مش مكتوبالها قفلة
بينى وبينكو يا جماعة

مرعوب م الوحدة موت
وخايف مرّة أموت
Alone زى الكلب
لا أنيس ولا أى جليس
ولا معزة ولا أتوبيس
وارحل موجوع القلب!
ولهذا نصحنى عقلى
بحكاية الإعلان..
يجوز أسلّى نفسى
مع كافة الالتزام
ببنود الاتفاقات
والتى هى كالأتى
أنا امليه البيانات
وهو عليه ينقّى
ملابس المانيكان
يا تيجى بيعة عظيمة
واغور فى أى داهية..
يا اموت من الكلام
واستدعى الموت بالعافية..
أنا حاسس إنى بدأت
أخبّط فى الكلام
وفى جميع الأحوال

الحمد لله يا حمار
كدة كدة رايح فى داهية!

بداية الكلام
ومضمون الإعلان
يا حضرات الركاب
قدامكو حمار حزين
على طول عايش مقموص
قرقان من البشر
اللى شبه العجر
سيرتى عاملينها لبانة
دايرة ف عجلة ندامة
والصنف دا من رأى
لازم من فوق نزميه
ولا حد يحس بيه
أبو قلب كما الحجر!

أسهل حاجة على لسانهم
يشتموا بعضهم بيا
ويقولوا.. إنت حمار
وكإن مفيش فى الدنيا
غيرى بس اللى حمار!

وطبعًا هى هى
نسخة وتلك الأصل
نفس الشعارات الراقية
نفس العبارات الخائية
اللى على راسى ترخ
بيعلفونى بيها
ع الريق وغير الريق
لما قرفونى ف عيشتى
خلونى أشك ف نفسى
من كورس غسيل المخ
وطبعًا معروف عنى
إن التكرار يعلم
كل الناس الشطار
والشطار بين قوسين
بيقوا قرايب الحمار..

نقول تانى الشعارات..
ممنوع عليًا الراحة
ممنوع بتاتًا الكُح
مش مسموحلى فى الدنيا
إلا بكُتر الشغل
مش مغفورلى فى الآخرة

إلا ذنوب الغُلب..
قال إيه الدنيا وحشة؟!
قال إيه الحياة كفاح؟!!
مفيش أجازات الجمعة
مفيش أجازات السبت
كل الأيام ملضومة
فتلة واحدة ومبرومة
وانا داير فيها سوّاح!
بقى كل غابات العالم
طارحة فاكهة مضروبة
ومسمومة ومعطوبة
ما فيهاش ولا شجرة موز
ولا قشراية تفاح؟!!!
الرحمة يا رب عندك
إعتقنا من التيوس
نجينا من الجاموس
خلينى واقف على رجلى
أنهّق كل صباح
لآخر لحظة ف عمري
من غير ما تذلل نفسى
ولا اعيش مجنون براسين
ولا يضربنى كُساح..

مش عارف ليه الإعلان
فيه حاجة ناقصة أكيد...؟؟
أنا حاسس إنى امبارح
كنت بردد كلام
باين عليه جميل
متأدب وابن ناس
يمكن مضبوط فى القفيا
حتى لو كان بالعافية
ودا كله برهان إنى
حمار حريف أستاذ

كل الكلام دا بقوله
دايمًا قدام الناس
كلام موزون يوضح
إنى مظلوم غلبان
وجاى غلط فى زمان
الناس فيه مش ناس..

لكن بينى وبين نفسى
شايف كشوف نتيجتى
على حيط لجان الدنيا
كاتبانى دايمًا ساقط

كل امّا اراجع نفسى
واكّر شريط حدوتة
حلوة ولاّ ملتوتة
فى الفصل الأولانى
بالذات الأولانى
أحس إن حكايتى
فيها كلام متناقض!!
إيه معنى انى احكيلكو
واعمل نفسى بتكلم
إذا كان ببقى مقفول؟!
إيه معنى اتباهى بمُخى
بصفته بدر منور
قال يعنى جن مصور
بفهمها وهى طيارة
وانا متنيل وخجول
وانا من جوايا جعان
مش مسموحلى بالراحة
ماليش الحق اقول
رأى برُبع صراحة
وعقلى مُهان مقتول؟؟!!

إيه كل اللخبطة ديّا؟؟؟؟؟؟؟؟؟؟
يادى الخيبة القوية
ما هى حاجة م الاتنين..
يا افضض جد جد
واطلع شجاع ما يخافشى..
يا اكنم واغل ف روحى
أكذب على نفسى وروحى
واطلع حمار بجد
وساعتها بقى مازعلشى..
مزعلشى من الآذية
من نكت الناس عليّا
وجايلنا التهزيء
لحمير قبلى وبعديّا!

سييكو من الفطار
سييكو من إنى حمار..
أنا قلت فى اعترافاتى
أثناء الفصل الأول
إنى عايش فى حالى
أسوأ من القبط
وأقل من الكلاب

لكن الحقيقة المرة
إنى أنا ال Problem
أنا اللى حقيقى مجرم
ماشى فى كل شارع
يا موطّى وبائع روحى
مدبوح زى العجول
يا اهيل وناسى روحى
شارب حاجة ومسطول
غرقان فى عيشة هباب
دا شىء شرحه يطول..
المسألة مش زربية
ومعاملة زفت مربية
المشكلة بينى وبينى
لازم الحقيقة تطلع
مهما تكون المصيبة

أنا قلت وعِدت كثير
إزاي الناس فاهمين
إنى موطّى مَهانة؟!
مع إنى كثير متواضع
وبضحك من جوايا
على كل الشمتانين

اللى عاملينها حكاية
وهى حكاية فعلاً..
حدوتة صعبة جداً..
ليها صحيح بداية
لكن مالهاش نهاية..

الورطة حقيقى يا سادة
إنى اتربيت من صغرى
على قولة كلمة حاضر
إنى اتعودت اوطّى
ولازم أفضل صابر
مسموحلى بكلمتين
همّا يا دوب اختيارين
إما طيب أو حاضر
للى عاوز يركبنى
واللى مش عايز يركب..
أنا اتعودت أخاف
م اللى غاوى يضربنى
واللى مش ناوى يضرب
لدرجة إن الأمر
بقى كله لخبطة
ماقتش عارف افرّق

بين برّكة كلّها مية
وكُّبس الكهريا!

يظهر من غير ما احس
أنا استحليت العادة
عادة الضحك عليهم
والشكوى من أفعالهم
وانى دايمًا مظلوم
همّا كمان استحلوها
يضحكوا على طول عليّا
يتريقوا على أفعالى
علشان افضل مكتوم..
كل مناهم فى الدنيا
يشوفونى حمار ضعيف
شغلانته فى البطاقة
يعيش وينضرب
عملوا ولاّ ماعملوش
أنا مستعد مُقدّم
ولازم أنضرب
وعشان ييقوا جابرة
لازم على طول أسامح
لازم أعيش مظلوم..

أنا كنت فاكرها لعبة
مسلية وظريفة
لكن يا خسارة طلعت
مصدية وسخيفة

أول مرة قالولى
هنلعب حاجة حلوة
إنت هتبقى المسجون
واحنا هنبقى السجان
هما خمس دقائق..
هما ثلاث دقائق..
والدور هيلف علينا
وكله هيبقى تمام..
إنما دور والثانى
لقيت نفسى مسجون
ورا القضبان على طول
برة القضبان على طول
وهما الباشسجان!!
يا جماعة احنا اتفقنا
الدور يدور علينا
وكل واحد فينا
يدوق حيرة المحروم

يدوق ظلم المظلوم
ويحاول يطفى النار..
أتارى كل دا كله
كان حتة حلم وطار
أوهام هبلة وعبطة
لازم عشان تتحقق
نعيش زمن أنتيكا
قعدت أهاتى وإنادى
ولا حياة لمن تنادى!
والآخر فضلوا مكانهم
وأنا فضلت ف مكانى
مفيش حاجة أعملها
غير العضضة ف لسانى..
غلطتى إن انا صدقت
غلطتى إن انا نهقت
آخرتها طلعت مغفل
آخرتها طلعت حمار!

كانوا الأول ماسكينلى
عصاية خفيفة بلاستيك
قالولى علشان أصحى
هيلفوا وسطى بآستك

لحسن أتوه فى السكة..
واكمنى لسة قاصر
دايمًا هحتاج لجام
يشدلى الفرامل
ويخلّى عيشتى تمام
لحسن افكر أتهور
واتكسر مليون حتّة..
وبرغم ثقتهم فيّا
وف أخلاقى التمام
لزقولى ف جنب رقبتى
جهاز لكشف الكذب
بيخاف جدّا عليّا
بينقّلى الكلام..

كانت الأول عصاية
تشبه للمسطرة
ورضيت بطرقتها
على اعتبار خفيفة
بتلسع.. بس ظريفة
من باب الاستعباط
لكن شوية شوية..
ضربة بتوجع والثانية..

النكتة قلبت جد
عصايتهم قلبت غم
وجابوها قصاد عنيّا
علشان يخوفوني
من غير ما يضربوني
وبيقيت فى نظر الناس
غلطان حاسس بالذنب
ومستنى الغفران
وكإنى بقول من جوا
يا ترى إمتى يعاقبونى
علشان يريحونى؟!
مع إنى مش غلطان!

وبعد المسطرة
كبرت السيطرة
والضرب بقى حلوانة
ع الفاضية والمليانة
بقت الحكاية عادة
والضرباية الخفيفة
والمسطرة اللطيفة
انقلبوا بقدرة قادر
إلى لُكْمية ثقيلة!

مكسوف أواجه روحى
واقول بعلو حسى
إنى موطى بالغصب
دا لإن ضربة منهم
من سوء حظى مش عارف
أو سوء نية منهم
جت فى العصوص بالطبط!
ضهرى انكسر وطأطأ..
وسطى انقطم م القهر..
فجأة من غير ما احس
ملامحى اتبدلت
حلاوتى اتبهدت..
حاجة نبتت من ضهرى
غريبة زى الديل
ودانى لوحدها طالت
وكل رجلى مالت
على زاوية قائمة لتحت
يا خوفى يبقى حيل!
عينى انكفأت ع الأرض
واللى غريب أوى فى الأمر
كل ما ادور على ضلّى
ألاقيه بيهرب منى
ومش لأقيه ع الأرض!

وكل ما اوطى أكثر
من تقل الشيل والخط
صوتهم يعلى ويلالى
وانا جسمى هبط وانبط..
فى الأول كنت بنازع
واجهد واعترض
لكن دلوقتى خلاص
إتعودت انضرب!
كل امّا يقربوا منى
عملت أو ما عملتش
غلطت أو ما غلطتش
من نفسى كدا والله..
أصلح راسى طيلة
وقفايا أسلطحه تار
عرفوا ازاي يهزمونى
عرفوا ازاي يوهمونى
إنى فعلاً م الأول
مخلوق أصلاً حمار!

أنا كنت فاكرها لعبة
أنا كنت حاسبها هزار

لكن ارجع اقول لنفسي
دى مش غلطتى وحدى
دى حاجة قديمة ف عيلتى
من غير أى ذنب
كتبونى فى الشهادة
فى خانة النوع..
حمار؟؟!!

الله يسامحه هو
الله يسامح جدى..
كان لما أحب اللعب
ينزل يركع على رُكبّه
يعمل نفسه حمار
ويقوللى شوف يا ابنى
عيب جدّا تبقى تغلب
عيب جدّا تاخذ حقك
دى حاجات تَوَدّى النار!
يا ابنى الرضا أمان
يا حبيبى الصبر إيمان
خلّى مثلك الأعلى
صبر أخوك الحمار
وكمان مش عيب يا حفيدى
لما توطّى رقبتك

وتعيش شوية حمار..
الرقبة ديّا يا سيدى
راكبة على زميلك
تقدر تدهنها إسود
وممكن تبقى ميتالك
صامولتها تحت إيدك
وطّيتها أو علّيتها
على قد الزميلك..

الله يسامحك يا جدى
ماقالش أبداً أبداً
إن الصامولة الخشنة
يجيلها يوم وتنعم
إن الألوان الروشة
يجيلها يوم وتعدم
كله ببيجى ممارسة
كله ببيجى بالعادة..
لحد ما فُوقت ف يوم
لقيت روحى فى كارثة
لدرجة إن انا فاكر
من كتر عشق جدى
لجناب هذا المخلوق

الهادى ومش مكار
كان دايمًا بيدلبنى
ومزاجه انه ينادينى
تعالى وروح يا حمار!!!

أنا كنت الأول بفرح
أنا كنت الأول بزعل
لكن بمرور الوقت
وكل ما أكبر حبة
وابص فى المراية
ألاقى صورتي راحت
ملا محى مش عارفها
مناخيري مش فاهمها
مش شايف إلا قفايا..
وشى هرب على فين؟
وشى هرب من وشى
مين اللى جاب مكانه
وش جناب الحمار!!!
يكونش حد واقف
ورايًا وانا مش دارى؟؟؟؟؟؟
يكونش حد خاّنى
وسرقنى فى عقر دارى؟؟؟؟؟؟؟؟

دا بيتنا دا صحيح
ولّا زريبة الحمير
إحتلت بيتنا شوية؟؟!
إحنا صحيح الصبح
ولّا نكونشى بالليل
ودى حفلة تنكرية؟؟!!!
وأغرب حاجة حقيقى
إن ذاكرتى الحديدية
حصل فيها زلازل
بدشليون ألف ريختر
جابوا عاليها واطيها
بقت ملبن عجمية
مش عارف إيه السر
إنى بنهق أكثر..
مابقتش مصدق نفسى
مابقتش عارف نفسى
كانوا يندهوا على إسمى
يقولولى تعالى يا حمار
إنت.. إنت الحمار
وانا ولا فاهم حاجة!
صحيح أنا مش بجاوب
صحيح أنا مش بهتم

لكن جوايا محتار
دا ما حدش قاعد جنبى..
دا مفيش غيرى فى الدنيا..
آمال المجانين دول
قاعدين يندهوا على مين؟؟؟
أما حقيقى دول ناس
نافوخهم طق وطار..
مين هو اللى اسمه حمار؟؟
أنا ساكن أوضتى لوحدى
وآخر معلوماتى
إن اسمى اللى ماليش غيره
حاجة غير الحمار!

لكن بمرور الوقت
شوية شوية لقيتني
ماشى وحدى فى الدنيا
بصفارة إنذار
لو أى خضار برسيم
لو أى حصان وبهيم
ما قدرش أمنع روحى
أنهق باستمرار..

أفتح ضلعة دولابى..
أحتاس ماعرفش اختار
أشوف خناقة ف شارع..
أبكى وازنجر وانهار
مايقتش عارف مالى
مايقتش دارى بحالى
أنا ماشى زى الناس؟؟
ولاً مقلوب على وشى
مدى إشارة انتظار؟!
يكونش الناس عبيد
وانا وحدى من الأحرار؟!
يكونش همّا فصيلة
وانا وحدى donkey حمار؟!!

الناس تضحك عليّ؟
ولاً انا مضحوك عليّ؟؟
وحلمى راح من إيدى
سابنى وعدّى طار؟؟؟
الله يسامحك يا جدى
لو كنت بهلوان
لو كنت صحيح عيان
كان يمكن الاقى علاجى..

لكن الورطة الكبيرة
لكن النكبة السمينية
إنى أصبحت جبان
عايش حمار بمزاجى!
مرضى صنفه خطر
شایل أعراض مُعدية
وحالة مستعصية..
لا علاجه بالبخور
ولا بحسن النية
الله يسامحك يا جدى
زرعت فياً زرعة
فاسدة ذهبها قشرة
آهى منظر والسلام
براها شهامة وذوق
جواها إرادة خِرعة
مربوطة بألف لجام!

أهم حاجة عندى
نبتدى فى الفصل الثانى

ونكمّل الإعلان
إياك حد يتخيل
إنى خايف من حاجة
وبتوّه فى الكلام!
لا أبدًا وحياة نينتى..
أنا مابخافشى من حد
ماعملشى حساب لحد
أنا بس حاسس السمس
نازله نقح ف نافوخى
واحنا ف عز الضهر

أنا مش عارف حصل ايه؟؟؟
الظاهر راسى تقلت..
وعينى يظهر غُفُلت..
وحلمت خير يا رب
إنى طلعلى لسان!
وكنت يوم إنسان!!
وبهبلّ فى الكلام!!!
الله يقطع السمس
وسنين نار السمس
هتجيلنا الكلام..
إيه العرق دا كله؟!

إيه الديّان دا كله؟!!
هو انا تعبان كدا ليه؟؟؟؟
ومفرهد أوى من إيه؟؟
ديلى مرفوع على حيله
وريقى ناشف ليه؟؟؟

أنا مش فاكر بصراحة
مش فاكر أى حاجة
إلا انى كنت باكل
وشوالى نُصه فاضى
دبييت دماغى جوا
عشان الحقل لقمّة
لقيت الدنيا ضلمة
عتمة وdark كُحل
لَفُ الحبل على رقبتى
خفت اترعشت ف روحى
من لخبطتى وسريعتى
دماغى انحشرت جوا
وماشوفتش اللى قصادى..
بعديها جوالى إيه؟؟
حلمت وشوفت إيه؟؟؟؟
مش فاكر أى حاجة..

مش فاهم أى حاجة...
أنا شايف إنى حمار
ومفيش شىء اتغير
صابر على طول وراضى..

أنا كنت وقفت فيبيبين؟؟؟؟؟
أيوه صحيح افتكرت..
على باب الفصل التانى
من صيغة الإعلان
اللى رسمته مع عقلى
علشان اقدم نفسى
يمكن تجينى بيعة
عظيمة والاقى عيلة
تتبنانى هिला بيلا..
ويمكن مالاقيش بيعة
وافضل أمشى ف مشاوير
وليله تجر ليلة
وانا لسة شايل الشيلة..

نقول تانى من الأول
بيقولوا عليّا حمار..
مش ناصح!!
مش مكار!!!
مع إنى مطيع.. مهاود
مهاود جدّا.. خايف
أستحمل كل شىء
أستحمل أى شىء
عقلى لفّيته هدية
لصاحب الزريبة
ودى حاجة مش غريبة
أظن انا حر ف ملكى
ومفيش حد شريكى
وعمر ما كان لى جد
ربانى غلط ع الذل..
أنا ماعرفشى غير صاحبى
يضرينى بأى حاجة
بعديها يشد رقبتى
جامد بعقد الفل!
وكإنه ماعملشى حاجة..
طلعت ولاّ نزلت
طوّلت أو قصّرت

مفروود ولاّ مكسور
نسخة وتلك الأصل
مدلدل مش مطيور
مستسلم مش بثور
أنا راضى بحالى يا سيدى
أهم حاجة عندى..
إنى أفطر برسيم
إنى اتغدى برسيم
والعشا أطفح خيار
وعذرى جوا إسمى
هعيش واموت حمار..
بسمع شتيمتى بودنى
واقول الله يسامحهم
كل دا علشان مش ناصح..
كل دا علشان متواضع
يا خسارة مانيش مكار..
وبعد دا كله برضه
يقولوا عليّا حمار؟!!

حدّش قال يشترينى؟
حدّش نفسه يواسينى؟؟
بايّنّى بكلم نفسى..

ياما فى الحبس مظالم
ياما فى الدنيا حمير
يا حضرات السَّمِيعَةِ..
يا حضرات الركاب..
قولوا معا يا جماعة
أنا أهتف وانتو ورايا
فليسقط الاستعمار!
فليسقط الاستعمار!!

ودى نهاية الإعلان
وقفلة الديوان.....
يعنى السلامو عليكو
سييونى أمشى طريقى
وافضل مُخلص لصديقى
لحسن دى تبقى عيبة
فى حق كل حمار!!

المؤلفة في سطور

د. نهاد إبراهيم

مواليد ١ / ١ / ١٩٧١ - القاهرة - مصر

ناقدة مسرحية وسينمائية وأدبية حرة.. شاعرة عامية..
قاصة.. مترجمة

حاصلة على ليسانس آلسن قسم اللغة الألمانية/الإيطالية -
جامعة عين شمس - ١٩٩٢

حاصلة على دبلوم الدراسات العليا للنقد الفنى - تقدير
امتياز - المعهد العالى للنقد الفنى - أكاديمية الفنون - ١٩٩٦

حاصلة على درجة الماجستير فى النقد الأدبى "شخصية
شهرزاد فى الأدب المصرى المعاصر" - تقدير امتياز - المعهد
العالى للنقد الفنى - أكاديمية الفنون - ٢٠٠١

حاصلة على درجة الدكتوراه فى النقد الأدبى "أسطورة
فاوست بين مارلو وجوته والحكيم وباكتير وفتحى رضوان - دراسة
تحليلية مقارنة" - مع مرتبة الشرف - المعهد العالى للنقد
الفنى - أكاديمية الفنون - ٢٠٠٦

لها العديد من المقالات والدراسات النقدية المتخصصة فى
الصحف والمجلات المصرية والعربية

شاركت كعضو لجنة مشاهدة واختيار الأفلام بمهرجانات
القاهرة والإسكندرية والإسماعيلية السينمائية الدولية

شاركت فى ترجمة وتحرير كتالوجات مهرجانات القاهرة
والإسكندرية والإسماعيلية وسينما الطفل السينمائية الدولية

شاركت فى إدارة ندوات محلية ودولية بالمهرجانات المختلفة
والمجلس الأعلى للثقافة ومكتبة الإسكندرية

شاركت كعضو لجنة تحكيم النقاد بمهرجان الإسماعيلية
الدولى للأفلام التسجيلية والقصيرة/ممثلة لجمعية نقاد السينما
المصريين - ٢٠٠٢

مثلت مصر فى لجنة تحكيم النقاد الدولية بمهرجان لوكارنو
السينمائى الدولى / ممثلة للاتحاد الدولى للنقاد/FIPRESCI -
٢٠٠٣

شاركت كعضو لجنة تحكيم بمسابقة الأفلام التسجيلية
والروائية القصيرة والتحرك بالمهرجان القومى للسينما المصرية
عام ٢٠١٣.

شاركت كعضو لجنة تحكيم بمسابقة الأفلام الروائية الطويلة
بالمهرجان القومى للسينما المصرية عام ٢٠١٧.

عضو فى

- * جمعية نقاد السينما المصريين "E.F.C.A" التابعة للاتحاد
الدولى لنقاد السينما "FIPRESCI"
- * جمعية كتاب ونقاد السينما المصريين
- * اتحاد كتاب مصر

صدر لها

- * **"دراما بلا حدود"** عن السيناريست المصرى عبد الحى
أديب - إصدارات المهرجان القومى للسينما المصرية - ٢٠٠٠
- * ديوان شعر عامية **"كلام أغانى...!!؟"** - دار النيل - ٢٠٠٤
- * ديوان شعر عامية **"شكلى مش زى الصورة"** - إصدارات
مركز الحضارة العربية - ٢٠٠٥
- * **"شهرزاد فى الأدب المصرى المعاصر"** - إصدارات
الهيئة العامة لقصور الثقافة - سلسلة كتابات نقدية - ٢٠٠٥
- * تحرير وتقديم كتاب **"عناكب فى المصيدة/ ثلاث روايات
روسية"** - المشروع القومى للترجمة - إصدارات المجلس
الأعلى للثقافة - ٢٠٠٥

* تحرير وتقديم الرواية الروسية **"موزاييك الحب والموت"**
- المشروع القومى للترجمة - إصدارات المجلس الأعلى للثقافة
٢٠٠٦ -

* تحرير وتقديم **"كراسة مصر/ روايتان روسيتان"**
- المشروع القومى للترجمة - إصدارات المجلس الأعلى للثقافة -
٢٠٠٦

* **"توفيق الحكيم من المسرح إلى السينما"** - إصدارات
الهيئة العامة لقصور الثقافة - سلسلة آفاق السينما - رقم ٤٩ -
٢٠٠٦

* ديوان شعر عامية **"إفترج يا سلام"** - إصدارات الهيئة
المصرية العامة للكتاب - ٢٠٠٧

* **"أسطورة فاوست بين مارلو وجوته والحكيم وباكثير
وفتحى رضوان"** - إصدارات المجلس الأعلى للثقافة - ٢٠٠٩

* ترجمة وتقديم كتاب **"المخرجون - كلايت أول مرة"** -
إصدارات المركز القومى للترجمة - ١٥٩٦ - ٢٠١٠

* ديوان شعر عامية **"فى بيتنا شجر التوت"** - ٢٠١٢

* المجموعة القصصية **"الكونت دى مونت شفيقه"** - ٢٠١٢

* ديوان شعر عامية **"كل كلام الأغاني"** - إصدارات مركز
الحضارة العربية - ٢٠١٤

* ديوان شعر عامية **"بيقولوا عليا حمار!!!"** - إصدارات مركز
الحضارة العربية - ٢٠١٤

* ترجمة **"تحت مقص الرقيب"** - إصدارات المركز القومى
للترجمة - رقم ٢٠٢٨ - ٢٠١٤

* **"قراءات نقدية فى العروض المسرحية"** - إصدارات
مركز الحضارة العربية - ٢٠١٤

* **"سينما حول العالم"** - إصدارات دار العلوم للنشر والتوزيع
٢٠١٥ -

* **"دراسات سينمائية متنوعة"** - إصدارات دار العلوم للنشر
والتوزيع - ٢٠١٥

* ديوان شعر عامية **"عيشة تسد النفس"** - إصدارات دار العلوم للنشر والتوزيع - ٢٠١٥

* **"موسوعة النقد السينمائي - تشكيل الوعي عبر القوى الناعمة"** - ٦ أجزاء - تجليد فنى - ٣٢٢٨ صفحة - ١٠٤٦ مقال - مقاس ١٧ سم × ٢٤ سم - إصدارات دار العلوم للنشر والتوزيع - ٢٠١٦

* **"قراءات نقدية في العروض المسرحية - تشكيل الوعي عبر القوى الناعمة"** - الطبعة الثانية - تجليد فنى - إصدارات دار العلوم للنشر والتوزيع - ٢٠١٦

* **"استلهام شخصية شهرزاد فى السينما المصرية"** - المجلس الأعلى للثقافة - ٢٠١٧

* ديوان شعر عامية **"فى بيتنا شجر التوت"** - الطبعة الثانية - إصدارات دار العلوم للنشر والتوزيع - ٢٠١٨

* ديوان شعر عامية **"كل كلام الأغاني"** - الطبعة الثانية - إصدارات دار العلوم للنشر والتوزيع - ٢٠١٨

* ديوان شعر عامية **"شكلى مش زى الصورة"** - الطبعة الثانية - إصدارات دار العلوم للنشر والتوزيع - ٢٠١٨

* مجموعة قصصية **"الكونت دى مونت شفيقه"** - الطبعة الثانية - إصدارات دار العلوم للنشر والتوزيع - ٢٠١٨

* سيناريو روائى **"دورى مى"** - إصدارات دار العلوم للنشر والتوزيع - ٢٠١٨

جذبت معظم إصداراتها انتباه قمم الجامعات الأمريكية الراقية لتحفظ بها فى مكتباتها مع نجاحات أخرى عربية ودولية.

تتضمن قائمة هذه الجامعات المرموقة:

هارفارد - ييل - أوهايو - برينستون - ستانفورد - كاليفورنيا، بيركلى - كاليفورنيا، لوس أنجلوس -

كولومبيا - تكساس أوستن - إنديانا - بنسلفانيا -
إيوا - واشنطن - نيويورك - براون - ديوك - متشيجان
فى الولايات المتحدة الأمريكية

الجامعة الأمريكية بالقاهرة - الجامعة الأمريكية
فى بيروت

جامعة بامبرج بألمانيا - جامعة مارتن لوثر بألمانيا

فى بداياتها ظلت تكتب شهورا طويلة مقالات نقدية
سينمائية بمجلة الكواكب المصرية بإمضاء "الأنسة كاف"

جوائز

* فازت المجموعة القصصية "الكونت دى مونى
شفيقه" بجائزة أفضل مجموعة قصصية ٢٠١٢/٢٠١٣ ضمن جوائز
اتحاد كتاب مصر

البريد الإلكتروني: nihadibrahim30@yahoo.com

بيقولوا عليا حمار..

مش ناصح !

مش مكار !!

مع إني حمول .. صبور

صبور جداً .. حمول

أستحمل أعيش فى الجنة

أستحمل أعيش فى النار

عقلى على قدى لكن

عاجبنى ومريحنى

أظن انا حرف رأى

ومفیش حد شريكى

طلعت ولا نزلت

أنا راضى بحالى يا سيدى

وعذرى جوا إسمى

هعیش واموت حمار..



ناقدة مسرحية وسينمائية وأديبة حرة . شاعرة ..

قاصة ومترجمة حاصلة على الدكتوراة فى

النقد الأدبي ، لها العديد من المقالات والدراسات

النقدية المتخصصة فى الصحف والمجلات المصرية والعربية

